


Widawa bak Mialukugal





Zovdom ke migexakiraf wid

Dimblira ke widava

Ugale Gallia gan nartaf aplec (Hun greltik isu Vandalen isu Gothen isu Franken isu Burgunden ikz-) zo tolgeniyir aze gan Normanden saneik kalanteyas zo guineyer ise gan keldapaf dubiesik zo kovilayar,


pune irubasik mivexuyud ise va intyon warzeks koe widaf tawek anton raweyayad.

Kaiki vuderapa ke decite ilana, dim dili, dolekik yoltkiraf gu «gopaf nugik» va vawa is kuksa



gin laxunobad. Va novexa bas jiomik ika grastu is sang seotad. Koe savsavaf galliaromaf wic greeltad. Va anelik is yonai parloesik kevlakid. Widava dadisa va debakany kene kazafa lyapa is nendana gu folkay vanpid vindaxo. Gidik vistaless va diveik, is begonyik is atelonyik sinkas va irubasikeem, is vageiasik, is kijasik kolnas va warzafo yasaxo re tid adraf.

Yasa (« feu » francavon) al jonkawed. Sanelia ke Paris nuve tir vas 200 000 rubasik bak XIII-eafa decemda. Mona dive migexa koe gasta zo vegeud. Warzafa migexakirafa widava koe tawaday ta jekura va tanealik wasarnas va aala dace zo vegeud. Suzdal !! va widava fu worat lize bak bat 1288-e ilana gazon gu Philippe IV soké.



Vawila bak Mialukugal

Rem tan folkayen tuvel suen gan sayakik is mielcekon buden kolanit. Ko dalafa vawila artlanit, i ko antafa vawila lumeyena. Kotara vawila tir vwepafa ik vristafa is orikafa num vektasa vas diblakirafa kelda. Sina kan fogel ik fogelom dile sinton zo katanad. Istef xatc va lava is traspuxa is zaileem miman gan irubasik ticu dilk kazawar. Aulon lanitison, va lumeticak gomoolanit, trabe va rebava kenolanit. Batcoba dile zo medrikafa : korik va rasokesa intezba isu empa isked.

Avlemodaf dolekik va sirga moe vraday deraykad ; eda impana gan astokol ok jaftol, gan deaxoltum zo elekad. Bulol kotlize joxad isen wil volped. Jontiktan koe vawila kotedje tid.

Vawila tir yoltiskafa isen mona otukiskafa. Korik kan viga dem sul, kan gamda alavon ice nuda, kan kudja ke tumtik koe ponyaska, kan sugduka kum glotcayan azil ke dolta, kan berma ke kulaf glastik oku jiomik, is kan uja va int gitcaluted. Vria konaklize tid : darpe ugal di zo vegeud.





Rumeik koe nuda vefad



Vultese stute

Puve koe widava

Vavila tir disukexa. Kottan diveon blir ise deasewer. Jiomik moe okol ok koe ilavot poko-lakid. Ayikya do pintik bene ge is dem eyelt moe taka gozad. Ayikye prilad ise van ulidebaxo belcon gozad lize



ekotapa dem vor is ekot zo zanoled. Rumeik spedud ike *marelle* ombud ike nesityud ike ondud ike vaskerombud. Tana gelukafa vefara tir *soule* uti tisi ambik ke nugaviputi ok vizuaviputi. Trura zo karolar. Vielu kon lexisik alavon ice vavila zirser, pune lanisik va nuba sinton narid ise toz *farandole* stuted. Daktesik va warzot pu sane kievoted : i va bartiv ke fenkura va tuvel isu budera, is va koblira is awalkera ikz-.

Jontik sanegaf relandesik koe widava greeltad. Maaktik plencad, dultesik va wed ik razeka tixulesid, sulemnedisik va grupeaf vakol is jidol is rupol atoed, faktik va atedafa rupa pwaded. Kotlize to ie is kizoyu is kipe sokid, dile dere rwama.





Pontet zama


* *Tensada* : aotceks dem sudafa tawa is bapla.

Mona

To ontine ke lipok va irubasik ke tawaday gevar ; dem konak vegem kum jasion inta is tensada*. Lentor ton zemosek vamoe nuda wexayed. Vwon ice ticef vegem, korik kan nuba wale toloya mona va sint riwe rotuzad. Tode zemosek me tir, pune lentor moe swalot kum inta ok rapor tazukas va trist wexayeson zo vegeduyud. Batkane korik bravanon rovo-valevolanid.


Lokulafa yasa va lodontinafa mona digid, i va mona dem dile zikayena rebava is rasek nedis va intafa gijarotiuca. Tode toloyo lentefo bedablo tid ke mil pilkotik, pune in kan besanafa remlanida meklabuson kagluyar, i kan *pontet* zama. Kulaf glastik keve vawila ok glabafa revava poka dalafa viga irubad. Wawik koe zionaf is abdaf lipok keve orikafa nuda ik kadimekusk va int licad.

Yud saneik koe aptafa revava ezeon zo afodad, i koe *ghetto* revava. Kotlize tey zo craker :: jontikviele tanoya mona anteyawer, pune varafa widava di zo koteyar.





Puntagum



Tuvelboyta is klantasiki

Dene int

Re dene kulaf dolekik ganeyes ta rielestura laní. Rielestura ba 10-e rielbartiv dum gubeon zo zanoler, solve sielestura (ikwe aabre) ba 4-e ok 5-e kielbartiv gidilizer. Baron bazeson va klantasiki* kev tuvel va int dakté.

Reme tuvelboyta*, ita va jin dizver azen tuvel zo fenkur. Vedgobesik va jin emuder. Va gem kum piako is toloya vukuda ton amidafa kseva diskir. To cava banugale tir. Kotrackaf filav bene anamba rumkawer.



* *Klantasiki* : myelginda ta bazera va tuvel

* *Tuvelboyta* : remakam reme tuvel ta awira va auzusik

Guto tid opelafo : tanoya azega is toloya starka is tanoy kold doykas va grita is tanoya rastokama is tanoya tinida atoesa va vopelafa porma. Tana rebava tir besayana gu tanoy storn. Ant tan dilk tir ralpakiraf. Kotar kan puntayani migajeyki espasi va afimi tir budeyen.

Abdi rundanyara va azega, va nubeem is art is iteem tcaté. Estura tir aultovesa : dem beg is vor is atela is kabay is lupa.

Kwiton djusevé. Meko divcepaxo krulder voxen mawafurutsa koe alava tigrir. Cek rem dilk ko nuda kaikion zo divkabatur.






Tipokesik

Tipu

Kotcoba ko nuda zo mimar ; ezba dem dorita kotlize tid, moe vraday, koe vria, koe kelor ke folkay. Atelonyik va bonol koe nuda diveon staked numen fortey ko xatc div-traspur. Socelasik va lelt tugadiad ise va almaxa koe bletap divdaakes va alitasa dakela tucudad. Kota batcoba me tir galafa : tovolap devilanaf gu pinga koe widava siudad ise va jontika akola dum keftakola dead. *Lepra* akolik tid jontik ise koe *lazzaretto* sostaxo zo bueded. Selasik viunsus va batyon kintik abicote tid.

Wori irubasik me tid zionaf. Gartonga koe mona mea tid voxen jontike kolavaxe koe widava tigid. Waveon gazdon iegasik dakted da lava tir idulafa. Belcon ayikye is ayikya koe jumegapa lebon pujedad oke koe idulafa ganta ke skofay paelped. Lantan va lukast gan tipokesik mbi gabed. Artan ulidebad oke zo xawad. Kottan askir inde djumer. Vartuca ke manyono xo tir kiewansafa.





Giyara va namulol



Femura va bayna

Dolekik is yambudik

Koe widava, kotcoba aneyana zo gotrasir : yambudik jontik-ote tid. Va intyona iaxa rontion doled. Ton belca koe lanyona vawila kare kobarinda tigid.




Atelonyikafa vavila isu kabay-
dolesikafa isu rogopikafa isu
dualtdolesikafa isu myotdole-
sikafa is awolbadolesikafa isu
glotcasikafa ikz- tid. Fli tid
tuaptapayani, gan ceptiasik ik
nouliiasik ik wediasik ik
anambiasik. Dolta yoltkirafa gu
epuxe keve vavila davon fen-
kuwed. Bata bopica kum inta
tazukasa va sirga zo tuomar
edje bana ton vrek zo kamadar.

Milebaf yambudik va dreema
tadled. Tegira pimtapanon zo
vertotar : biura va kobara abdi
ticawaltara is radimi titawaltara
(fentugalon kobata wali 8-e
bartiv isu 17-e rotir); biura va
kobara wali miafiz ke pereaviel
is taneaviel, voxis joraviel
(jontikote) ; vebara va epura
va duganyaf warzeks, dizvenon
gan anelik. Onya gan feliik
dirgas va dodeladositik zo
gader. Silukon vanpitison feliik,
dodeladositik va grot* gon-
epur. Voxisen nazbeik den feliik
gan gadik zo rundad. Bat
ravesik va eba remi konaka
tanda mbi taved.

Enwe kobara tir bagafa kiren
tilik do lanisik ba beta katecta
giprilar.





Yon talolk

** Fortura va talolk : doma ke talolk zo fasiayar enide tciamafa yanta abicote di zo malseotayar.*

Kaza

Kaza tir dalafa tegira ke wida. Zolonaf wid gamdon ice golesa kelda dum vawa is bost kle tigid. Tulon Paris aname za novesa va vamolanira va Seine bost voneweyer. Koe bato xo, dolekik pridud moe jaftolafa edapa sotre vieleon 30 km- va doleks robasvajad ike lizukon rodoled oke mo detckiraf riulk kototad, i mo tota kenolapis va bost kal bira ton vieleafa kalie vas 200 km-.



Za tir besayana gu intaxe dem konak vegem. Vawila moolanisa va za vawale dolta ke erbabeitayesik tigrir. Larde kota gola va intaf tal dadir, pune erbabetayesik va talolk vanburen gan dolekik aldoad ise va moavafe ok dilgavafe tadle ageltad ise va mefortunuca* tugadiad ise gu lizukaf tal vas mila voda ikabetad.

Taruteteson va slika patavara, lan tanaf bolk omavaf gu *livre* tal loloon zo vanikatcur. Kot *livre* talolk vas 20 *sou* volveytalolk vodar. Tanoy sou talolk vas 12 *denier* volveytalolk silukon vodar.



Kazaxo

Ba lanyona titickafa evla, dolekik koe milyono xo va sint kakevetcad : koe Lendit poke Paris bak teveaksat ; koe widavapa ke Champagne gola (Troyes is Provins is Lagny is Bar-sur-Aube) ; koe Vlaandera (Brugge is Ieper is Lille) ; koe Languedoc gola (Pézenas).


Koe batyono kapaxo, inta is myotxa ke Hansa dreema (ke molt kene Balta bira), is awolba is lesoxa ke Roneka, is moava ke Afrika, is eip ke Guérande koe Breiza, is dug ke Espana... zo ikadigid. Jijacek ke kapaxo tir vas toloya ik baroya safta. Taneon alubka ok tevka ta rundanyara valeve gardap ok lizukon inkera va broca moe viga ok nuda tid adrafa.



Dolekik kare aptaca va sint katanad : iasik va xeka is dolesik va kor ikz-. Vreda dere zo gotrasid. Lana revava mu germanik zo ickriled, aryona mu italiik ok provencik.

Dolera bam zo robokar. Remi mon sanka jjar. Dodera bak ironokafa safta oxam zo askir. Tode korik va erba me dadir, pune bas beitasik dulapokon erbabeitur.





Dota


Ta gadera va wid, lokulaf glastik va dota dem tanoy taneagadesik is san-toloy sol-libuyun pirdasik al redud. Sin koe dotaxe kagrupen gu keyelt tis ontinaf rasek va sint katanad. Dota va gjarotiuca kev jiomik is moekote tujradik batkane ruyer. Dum jiomik, dota va intafa kueca* dadir. Glastik va tunuyalasa efaya bas gazik al seotayad.

Va irubasikeem ronokoaykad, va yambudik memalaskis va vexeeem ke dilintafa exava ronomalyed, va ardiat rono-grustad. To dota va bartiv ke fenkura is budera va tuveleem ke wid gorar. Va baseroltara va keldegeem koaykar enide fird di zo taruted. Biur da korik mielon divlanid, ise grustason va mielafa fiera, jupar da alom zo malaskir. Tod wupe, biota ke keyelt mamar enide ervolita ruldasa vas ayikyeeem klaaf gu 14 ik 60 tanda is rodiskis va ervo di zo katanar.


Voxen roti ke dota gan kuranira ke gazik ik lizukaf tujradik ik jiomik zo kimad. Wawik va koncoba luxeon me romuxad nume dile exud.

* Kueca : olkotcapa gretcayana lize
keveon solwifa sutewa ke widava tid.





Plugamdak



Zovdom ke uja

Uja

Mali Romugal, tujradik tir tan okilik ke wid. Zo tarkar kire va Lorik is Papik kaatoer. Tir kulat kire va taway digir. Tir gjarotit kire dum jiomik va irubasikeem rokoaykar ise va korik romalyer. Targuca ke ujaroti tir datafa. Ezgalday bal alkafa jorapa ok erutuson pu Kelt va

muvara mo miduxo ok fraskera va akolik zo grustad. Tumtikafa senteja* kobudeyena koe sentejak koe widava battode zo gestad. Voxen Lorik va locoba ware riwer. Cuisafa uja mu in zo kolnad. Varafa sanelia va vevedura paker.




Tuke plugamdak vonen mali 1140, galza adre zo tuontinar, tamaxo zo tumantar, rebava gu datafa trivaga kum ksevaf is afif ralpot zo remrud. Jontika kudja keve lentor is vamoe resta is swalot va tumtafa izva kareizud. Monama is dolta wale sekol* ayated. *Gothic* yamba va *Roman* yamba adre ikaplekur.

* *Senteja* : niska ok nela tiyisa ke lan tumtik.

* *Sekol* : blaganaf swalot giskis va rebava.

Tujradik koe berma dum gijat jiomik albas va tcunke is tcabanera giblir. Ta lofa yastuca do sane, yon alkik va xida idjon ice widava koe wawafa revava exoned.





Sentejak



Divefa rovava

Xida koe widava

Bat wipites tucpastik tis naz-beik ke dolekik ok yambudik va betcoba vol djudigid nume va buriefara anton blidad.

Tid godevrik ke Francesco, d'Assisi tumtik (*Ordo Fratrum Minorum* veemik dere yoltan gu *francescoik*), ok bewik ke *Ordo Fratrum Praedicatorum* veem (dere yoltan gu *domin-goik*).




Dalafi fli ke wipites tucpastik tir tujdera*. Jontiktan va sinyona fanya djukatcoked kiren va jiomikeem meklabuson malyedad. Tari jontikote tir eke uja tir pinarsafa. Tujdesik ko divefa rovava ok kev rebava ke uja ok mo grest iste viga barr rundanyar. Tucpastik va copik dere viunsud ise va sinka is guazafe vage anamzilid, reduson va tompuza*.

* *Tujdera* : dewitca icde alkafuum

* *Tompuzza* : walpomasa gesia

Va befoltik is akolik emuded ise roped. Va belira is sutera is dankara pu rumeik taved. Voxen dota va intyona bema dere redud lize nazbeik ke dolekik va patavara is rokopa is divefa ava is tawavopa. Kotla dum Sorbonne koe Paris dere krulded.





Kumba


Malyerot

Tujradik is dota is nafalik va malyerara kotote rokad. Taneaf va korik meveges va ujaroti (tilbuik* is lamtasik*) malyer. Glastik va yambudik me malaskis va vertot ke eba ronolanzad. Jiomik va dubiesik is gomilasik ester. Batdume icle baroy flint koe widava is konako klibuxo tid, i klibuxo jadion tigiso moe vigapa ok alavon ice vawila.

Yambudik iayas va dugajaf warzeks ok mielon kobayas remi toloy bartiv dijunon zo kabdunedir. Taka is nubeem kaike azeb kum inta zo rundad azen kevmimason va zaxas ilt, lanisik susked. Filavgabeyes dubiesik va nuba ok oblaka mbi gabeyar. Tilbuik moe teyak blison zo anteyar. Rolatalusik ko blet dem lava ok lembiena punta zo estobar. Gomilasik kan kufta zo bastakar oke bene kumba zo rumkar oke zo krafolklibur* oke zo tcarged. Kotbata disukexa tir kiewatcapafa isen saneg kotviele taxapar.



- * *Tilbuik* : korik amidon rietes tove ujaroti.
- * *Lamtasik* : korok lutsagas va Lorik.
- * *Krafolklibura* : rejdera joasa va niskeem ke lanzanik moe krafol.




Widava jorur

Bak jontika katecta, varafa widava jorur. Ba *Kristnazbala-viel* mona is vawila zo ziked. Bak *Carnevale* jora, irubasik gu govitol va int efud. Bak *Oviskikafa Jora*, jotik ton guazik askid, ayikye va ayikyafe vage diskid isen kwik va jiomaik riwed. Bak *Pasca* alkajora oku Toussaint, *misterium* drunta zo zirsed, trabe teca alkafa wenyaxa. Bata drunta barkon dile jijad, mali riel kali siel. Ba 24-e ke teveaksat , *Ioannes Baptista* jora ton daavaf teyap zo fiptar...

Jontikara waunesa katectapa tid. Tela lolistafa tid sersikafa kolakira. Widava varon zo tucuar. Tatceteson va kildera, lumeeem va bixe is werd is imwa zo besar. Ksevaf dualt bene dilk rumkawed ; xult-vokoda koe vawila al zo vanmadar ; sul va vor putcegad. Viele sokra mamad ise va artlakira ke sersikafa teixa dakted, pune taneagadesik is dotaf pirdasikeem va tuvel kabdulanid aze va tselkak ke widava pu korobik atoed. Azon kottan kali tena ke mielcek dankar ise stuter.

Suteyen koe minaf widany bak 1288 tumtafa ilana gan Alinus tucpastikye tise nutik ke vartanyafe Enguerrand tucpastikye.





Widava bak Mialukugal

- 1. Dimblira ke widava*
- 2. Vawila bak Mialukugal*
- 3. Puve koe widava*
- 4. Mona*
- 5. Dene int*
- 6. Tipu*
- 7. Dolekik is yambudik*
- 8. Kaza*
- 9. Kazaxo*
- 10. Dota*
- 11. Uja*
- 12. Xida koe widava*
- 13. Malyerot*
- 14. Widava jorur*

Skura : Gabriel Antiange (2023)